



PILLANGKATA KOCHUAM PITING AH LANKAINA (28-04-2024)



To,

If undelivered please return to - TPC Office,
 P.O. Box - 107
 D. Phailian,
 Churachandpur - 795128
 Manipur, India



ESTD. MARCH 2008
 JUNE 2024

Monthly Christian Magazine

Hinna Vâk

AN ORGAN OF THE TANGPHAI PRESBYTERIAN CHURCH



KHRISTIAN LABU REVISED & ENLARGED EDITION

- Kochuam mite leh Kani (Poppy) lei bawl/chîn
- Khanglaite leh Lapawl ah nasepna
- Lalpa ah kipâk
- Thagau Thiangtho leh Gingtute

Editor : Rev. S. Lama Vaiphei, Executive Secretary

Joint Editors : Rev. P.B Zosapthara, Consultant
: Rev. K. Jama Vaiphei
: Rev. Th. Samuel Vaiphei
: Upa Lalminsang
: Upa S. Lalpi
: Pi Hawipakkim, Secretary, CKNP
: Tv. Lianmuanthang, Secretary, CKKP

Business Manager : Pu Langlalthamuan
TPC Office D. Phailian
P.O. Box 107 CCPur-795128 Manipur
Phone No. +91 9958160325
Email - *ehinnavak@gmail.com*

Kum khat lak man : Rs. 150.00

A man pia nuam leh a la thak nuam ten Business Manager kianga hiatsak ding.

A SUNGAH THU UMTE

1. EDITORIAL	01
2. KOCHUAM HUANG	02
3. CHRISTIAN LABU REVISED & ENLARGED EDITION	03
4. KOCHUAM MITE LEH KANI (POPPY) LEI BAWL/CHÎN	06
5. KHANGLAITE LEH LAPAWL AH NASEPNA	12
6. LALPA AH KIPÂK	16
7. BUALLIAN RELIEF HOUSE REPORT	20
8. SERMON	
a) Haksatna i tuak zinglai a Lalpa bel zing a kûl leh pawimaw zia chuh	22
b) Thagau Thiangtho leh Gingtute	28
9. HISÊLNA HUANG	32
10. KNP HUANG	37
11. KKP HUANG	39

SYNOD PUIPATE

Moderator : Rev. Kamkhotinthang Neihisial
Secretaries : Rev. Thanglianlal (Sr.)
: Rev. Andrew LR Khiangte (Jr.)
Finance Officer : Rev. S. Khaikhawlam
Statistician : Upa S. Thongzalal
Executive Secretary : Rev. S. Lama Vaiphei
Consultant : Rev. P.B. Zosapthara

Hinna Vâk ah thu kisua zosia hi Editor ngaidan a hi suak puai



Pauchapna Thupi:

1. Kochuam tin te'n Thagau lam ah halthakna i chan thak kit chiat theina ding uh leh Pathian lunglam i hawl chiat theina ding un pauchap hitiu.
2. I gam ua zillai chapangte, sepna hawl zing laite, Pathian thu (Bible) zillaite â ding in pauchap hitiu.
3. Lapawl ah Pathian nasepna lam ah panlatu Synod Choir, Pastor Bial Lapawl leh Kochuam Lapawl te â ding in pauchap hitiu.
4. Gamsung buaina ziak ah panlatu pawl chuam chuam ah puitute â ding in pauchap hitiu.

WHATSAPP & FACEBOOK

(Tulai khawvel a phat taklo ziaak in media mat chingthei hi tiu)

Tulai in WhatsApp leh Facebook ah thuthak a simdaw leh a simlai ah a lungthim ah hung kilang chu ngaitua nawn se selo ah comment ngal mai. Ka thugen hi kua kuan ala sim diam, bangtiang a sukha thei diam ti ngaitua zui keilo mi i tam ui.

I comment khat mai mai ziaak ah meichang nethei, suangkul lutthei, chuleh i comment ziaak mai mai ah i nampi minse thei, i nampi hin gâl neithei i hiu ti hi kihe zing hi tiu. Zia haw chu ka lau puai tile a umthei maithei, maleh nang ziaak ah gâl hung piang, nang la kisel mang ta, la nam mite bang hem zat in a thi khawlaw a khan la kipak zel diam?

Chuti a hileh thip hiat hiat mai ding tina a hi diam? Hilo e, i lungawilonate, i haksatnate hi immang zianglo ah i kikodaw uh hi Pathian thu tawh a kituak a hi. I phodaw masang ah hiat ding pawimawte: I lungthim ah i ngaikhawk chu phatak in i zikdaw ding a hi. Gun tak ah vel simkit in, i paukam matte haw hile a pha na em ti vel et ding a hi. Zia thu hi kei gen ding in a kilawm na em ti le kingaitua ding a hi. Ka thugen hi kua ten sim ding a hem tile ngaitua ding a hia, banggual gapha, gaphalo a sua thei diam ti hi buai pi ding a hi.

I lungnat ziaak ah hanse tincheng vak suklat ziangte, nam leh nam kal ah kibuai theina khawp khawp gen ah kido puang ziang ngam le kium ta ding hileh kilawm. Zia gual ah media lam a mihangsante haw hi buaina tak tak a hung tun hun ah a la kihemmang ziang, midang in a thawk ding po a hung hisek hi. Ziaziaakachun, media i matphak tiang hawu hi chingthei tak leh pilvang tak in kochuam leh nam kipumkhatna ding lam in matthiam gaw chiat hi tiu.



Kochuam Huang

Buallian Kochuam leh S. Bualkawt Kochuam vena

April 16 & 17, 2024 ah khan Office ah Puitute'n Buallian Kochuam leh S. Bualkawt Kochuamte vena a neiu'i. Rev. S. Lama Vaiphei, *Executive Secretary* in kalsuanna ziak genlatna nei in, Rev. PB Zosapthara, *Consultant* in Thugenna hun a mang hi. Zia Programme-te ah hin Synod Choir-te'n Pathian chawihawina La sa'n hotute a thuap thei ua, kipak um a kisa takzet hi.

Thigawpi ziak ah siatna tuak

April 20, 2024 (*Kiginni*) zan ah huipi hât tak ziak ah i Kochuam sung ah chenna In tamtak suksiat in a um hi ti thu hiat a hi. Relief House kisate Sumtukphai, Buallian leh Panglian khuate ah In bang a hem zat suksiat in a um a, Office leh siatna tuak Bial leh

Kochuamte kithua in puaphat kit a hi.

Chanchin kihiat dan in Lingsiphai, Mata Vengthak leh Leilon Pastor Bial sung ah L. Munlui kochuamte ah chenna In hunkhawp a sia, kochuam in panpi thei ding dan ngaitua in a bawzui hi.

Kochuam Piting ah lânkai

Pillangkata Presbyterian Kochuam, Guwahati Kochuam a la kiti sek chu April 28, 2024 (*Pathianni*) ah khan Rev. PB Zosapthara, *Consultant* in Kochuam piting ah lângkaina hun a va mang thei ah, kipak um a kisa'i. Kochuam dinmun zia gual hi a hi-

Inzat	: 49
Member zosia zat	: 212
Pawsal zat	: 97
Numei zat	: 115
Dan zokim zat	: 146
Pastor zat	: 1
Minister zat	: 1
Kochuam Upa zat	: 3
Tual Upa zat	: 7

“KHRISTIAN LABU REVISED & ENLARGED EDITION”

~ *Upa B.T. Khampu
Kangvai*

Amasa’n, Hinna Vâk simtu zosia Lalpa Jesu Khrista min in Achibai ka hun buk hi.

Kum 2013 a khan Mizoram Presbyterian Church Synod in a matlai uh KRISTIAN HLA BU based ah Vaiphei pau ah ledaw phalna ei piau a, ledaw a hi. Zia chu kum bangzat a hem sung Pathian Biakna leh chawihawina’n i la mangthei ua, kipak a um ma ma hi. Zia chu a hi zing lai in, a phazaw leh hawizaw ah siamphat leh belap pawimaw sakna i hung neitau a, zia gual hin panlâk a hi.

Joint Presbytery Committee 22:11 (2019) chun 2013 kum ah kisun pen chu Edit leh Enlarged hileh a tia, Manipur Area Committee ah tut a hi. Zia chu Synod Executive Committee ah tutsawn in SEC 280:32(2019)chun lemasakpi ta. Tichun, a hung buaipitu ding in Rev. R. Lalhmingsanga, A/S (Convenor), Rev. PK Lianmang, Upa BT Khampu, Upa Genlallian leh Upa Nengsuanthang-te chu guat a

hiu. Rev. PK Lianmang leh Upa Nengsuanthang te chu a thu leh La endik ding ah chantum piak a hiu a, Upa BT Khampu leh Upa Genlallian chu a Solfa endik ding ah chantum piak a hiu. A vaikhawnung deu in kidai zawlona a um ziak in Rev. Malakia Lalnunfela, Rev. Nicky Lalremmawia leh Rev. C. Lalrinliana te chu guat belap a hiu. Covid-19 hipi lèn ziak in na chia zinglai chu chawl phawt a hung ngai

ta. Zia bân ah chun Rev. R. Lalmingsanga chu a term a hung bei a, a kichawndaw tâk ziak in na a chiatha zung zung thei talo a hi. Zia nung ah chun Rev. P.B. Zosaphara, A/S thak Convenor hina in mabân sutzawp kit thei a hung hi bep hi. A tângpi etzaw a hi ta, etkhawm zel a hi zinglai in, Upa Genlallian in ei mualliam san thut ta mai a, da-um a kisa ma ma hi. Ama a Solfa zosia Typing bawltu a hi. Ama chanvo chu midang in lasawn in sutdawk theina di tiang ah panlak to zel a hi. Chantum kihawm ah etdikte chu lakhawm in Computer chuam chuam ah thun a hi nung in, Computer file kituplona a um khak ziak in khumthak vek a hung ngaita, tichun a bul ah kipan thak kit in, a file type bawlsate le theng danglam vek a hi.

Zia Labu Revised & Enlarged Edition hi genbâng a tawm theina di ngaituana'n Consultation Meeting 2-vei ko a hi. Zia Meeting ah

chun Bialtu Pastor zosia leh Bial ai-awh ah Bial tin ah kipat in mi khat chiat leh mi pawimaw khenkhatte ko a hi sek hi. La thu khenkhatte hi dawidan a kibang suak pua, a tamzaw dawidan chiapi mai a hi. Etsakna'n, 'Malai Israel mipi zosia, Tuipi luang a ting tan'- (a chang zosia ah) tite, 'Lou mangbang paihsa' tite, 'Lungsiat in la nu Mari gual in ei ngai in' tite leh a dang dang gen thei tam in a. Zia gual ah Consultation (Kikupkhawmna) guanggal ahi nung inle, duthusam tinglo a hina bang ahem zat um ngei ina. Mangtute'n i hetthiam ua, a lawk thei di pen ah mang ding in i kichiatsak un i kichial uh a hi.

Labu Committee chun a Bu masa ah La 487 chu La 100 khum belap hihenla, Lengkhawm La 70 leh Solfa La 30 hileh ti lem a sak dungzui in La 100 kaikhawm a hi. Ahinla, Typing file a kibawl tak tak phat in, a Bu masa ah umsa khenkhat ala um khak ziak in

HINNA VÂK

La 98 belap a hung suak ta, kihethiam mai hitiu. Khum belap ding La hung thawtute zosia kiang in kipakthu i gen ua, a dawлло zia ah khum khaklote kiang in ngaidam i dawn ui.

Labu khatvei zawfel ah ngai ahi nung in a Software lam a siat zia ah in Synod Office Staff te'n theitawp in pan a hung la kit ua, tu dinmun gual ah siamthak kit suakkei ahia, Office staff-te panlakna zal ahin le kipak a um takzet hi.

Zia La Bu hi matthei ding ah sutzaw a hi tak tawh kitawn in, March 7, 2024 (Ningani) sun Dak 11 in Pathian kiang ah Latna, Tangphai Presbyterian Church Provisional Synod Office, D. Phailian ah nei

a hi. Rev. P.B.Zosapthara, Consultant in mapui in Rev. T. Zuanlal in Pathian kiang ah Latna hun a mang a, Rev. K. Neihzial in pauchapna'n hun a khak hi.

Zia La Bu Revised & Enlarged Edition buaipina ah hin Rev. P.K. Lianmang leh Upa Genlallian te hin nasatak in pan a la zaw diak ui ti muthei a hi zia ah in a chung un lungdam a um ma ma hi. Rev. P.B. Zosapthara, Consultant leh Rev. S. Lama Vaiphei, Executive Secretary te hin a sutdawna lam ah nasatak ah pan a lak zia ah unle a kiang un lungdam thu i puang ui. Chuleh, a sutdawna Press lam ah mawpawtu SL&PB chung in kipakna sang tak i lân bawk ui.

● *Pathian naseppi la hi chun la guanggalnate chu a thupi di a hi.*
~ D.L. Moody

● *Pathian nâ, Pathian dawî dan tak ah sep chun Pathian ah kîpat malzawlîna tasam ngai pua'na*

~ Hudson Taylor

“KOCHUAM MITE LEH KANI (POPPY) LEI BAWL/CHÎN”

~ Rev. Thanglianlal,
Secretary (Sr.), TPCS

Thumapui: Ei uh gam bep hilo Kani lei bawl/chîng gam ala tam ma ma a, Afghanistan, Myanmar gamte hi a diak ah a ha bawl pente ah tepte a hiu. Manipur tawh kigamgi Myanmar hin Drug trafficking (*Khamthei ah kiveina*) chînna, siamdaw, hawpzak leh zawkte hi a bawl nasa, Gamdang ah kipat Khamthei (*Drug*) tawlgukna leh Sumkawlveina dinga hin North East gam hi lampi hawitak a hi ziaak in “*Golden Triangle*” (*Tri-junction of Myanmar, Laos and Thailand*) ala ti hial ui. Manipur gam ah ei Thingtang miten Kani lei bawl/chîn hi khangkhat vâllam ala chiapi ta, tumalam a khan Manipur solkal in “*War on Drugs*” a puan ziaak leh nasa taka a malakna ziaak in a (Poppy) Kani lei bawl/chîn hi a kiam nasa ma ma’i a ti thei hi. *Manipur special Anti drug Unit Narcotics and Affairs of Border* (NAB) - in a gendan a chun, government in kum 2017-2023 kikâl in Kani lei bawl/chînna Thingtang gam acres 18,664 (Kangpokpi- 4,397 acres, churachandpur-2,700 acres) a susia zo hi ti’n a report hi.

Bang ziaak a Kani (Poppy) lei kibawl ?

Namdang leh gamdang gentaklo, bang atia ei Manipur Thingtang mite hin Kani lei bawl hiti lawm ah a la tam ziang a hi diam ti’n kidawng leuhin

a ziaak hi ding ah ginchatum tamtak umthei ina, a ziaakte hi thupi in thupilo hitaleh ginchat um deu ah kilang a tangpi deu vak tâklang hitiu-

Poppy/Kani lei bawl/chîn hi masanglai chanchin tawh

HINNA VÂK

kizawpmatna thûk tak nei hi'n a kilang hi. Manipur ah Tribe chuam chuamte hin masanglai Pi leh Pute hunlai pek apat ah chawndan leh sakhua thil ah khamthei/Drug kiti (Opium) hi a la nêk seku a hi. Tuhin a hileh changkanna a hung um phat a hin mi tamtak in nekhawlna tak in a hung neitau a hi.

Gam Politics leh kivaipuakna a la hawilo zia in government ah kipat panpina mipite kiang a tung hawipua ma ma a, sum leh pai ah nekguk leh chakgukte, nek leh chak, inchen-lochen haksatnate, Infrastructure leh Institution, zilna (education) lam hawi zawlonate leh sepna kitup mu a tawm ziate hin kihinsua theina ding lampi umsun ti zia in Dan phallo himaleh kani (Poppy) lei bawl/chîna leh Khamthei (Drug) ah kiveinate mi khenkhat in a hung bawl khawlaw'u a bang hi.

Manipur hi Myanmar gamgi chinha in a um a, Manipur gam hi gam phatak, Kani (Poppy) lei bawl/chîna dinga

pha, thaichi dangte sang ah chîn bailam zaw ma ma, sum muna bailam ahi ziate hin sum leh pai dinmun haksate leh nasemtu (Farmers) te chun thildang sang in a têt zaw'u a, khenkhat Thingnuaimi leh meithal chawite tawh kikhutzawpmatna phatak a nei ua, amau apat venbitna a um ban a, sum leh pai ah lawkna tamtak a dawn sek zia kun Kani (Poppy) lei bawl/chin hi a hung tam diak a bang hi.

Kani (Poppy) lei bawl/chîn a phatlona

Kani (Poppy) lei bawl/chîn leh ama apat pawt Khamthei (Drugs) kiti him him chun sukkhak a hau a, mimal, Insung leh khawtâng a susia, zia ban a chun, i chennau leilung umdan leh i kiang kimvel (environment) nasa tak in a chawkbua i zo hi.

Environment kiakniamna:

Kani lei bawl zia in Thing leh gua ei tuamtu (i kiang kimvel) haw hin nasa tak in a thua hi. Lo bawl miten thai thasang in Kani lei bawl/na'n

gammangte a satchai ua, zu leh va tamtak chenna neilo in a siam a, ganhing thana damdawi (lunglo) a ha mat ziakun leiphatna a sukiam a, leisiat a suk dengdel khawlaw a, leimin a siama, leinuai ah tui umte a subuak a, thaichi dang chînna tâklo a siam hi. Boruak lum leh vawt a sukdanglam bâk a, boruak thiang a sunen a, boruak ah damdawi (chemical) lau umte ziak in mihing leh gancha chung a natna lau um a tut a, mihing leh thilsiam dangte hiselna a susia hi.

Insung leh khawtâng a sukhai: Kani leh ama apat kisiam khamthei (Drugs) opium leh heroin-te hin insung leh khawtâng a suse ma ma a, khawtâng ah tualthana a supung hi. Mihingte kilaiguizawpna a suksiat ban a, insung gentheina a tun a, kiakniamna nasa tak a tun hi. Kani lei bawlna ah nasem Numei leh Chapangte chu matsual a hui a, zu leh sa khamna leh zawntat thanghuaina'n a puilut a, sumdawngna diklo in a puilut

a, taksa, lungthim leh thagau lam tiang a khawisia a hi.

Kani (Poppy) a pat ah kisiam dawk khamthei chikhat (Opium) kiti hi thil lau um tak, zawngsak bailam ma ma leh mihing taksa ah hat haksatte, natna hik chuam chuam veinat, lungthim lam buainate a tun a, chuleh, Kani lei bawl/ching Mi genthei nekkawm hawlte chu mihausa-te khut in thâng ah âwk gual in a âwk ta sek ui.

Kochuamte'n hin bang ti panlak ding?

1. Solkal tawh pankhawm ah do khawm ding a hi:

I gamua Kani lei bawl, Khamthei nek leh a guk ah kiveinate a pung nasat ma ma ziak in Manipur government chun kum 2017 a khan "War on Drugs" ti a hung pandawk hi. Zia khamthei ah kiveinate hi minautang beplo Politician-te, businessmen-te, Police leh Military officers natiang a kigawl ui ti mudaw a hia, zia hin Solkal lu a suhai ma ma hi.

HINNA VÂK

Khangthak Khristian-te lak ah Kani lei bawl, khamthei chi chuam chuam hung pung zelte hi Solkal tawh pangkhawm ah dokhawm a pawimaw hi. Manipur ah Kochuamte kikkaikhawmna sangpen *“All Manipur Christian Organization”* AMCO chun Kani lei bawl a phatlodan taklang in malakna a la nei a, Chuleh, *“Churachandpur District Christian Goowill Council”* CDCGC in le zia gual bawk a chun Kochuam te kianga Kani (Poppy) lei bawl/chîn haisan ding leh Khristian-te â dinga khamthei kiti hi thil zachat um leh kilawmlo ma ma a hidan a la taklang kit hi. Ziagualma a chun, ei uh Tangphai Synod Kochuam inle kum 2023 a khan lekha sua in Kochuam tin in Kani lei bawl leh khamthei i gam ah a beina ding ah ma la chiat dinga dawtna a la siamte haw ziak a hin, a phatchuamna a hung kilang deu deu hi ti i muthei hi.

Ziaziakchun, maban a hinle Solkal in thil phalo dona kawnga a malakna taphawt hi kochuam te'n nungthuap zel thei leuhin i gam hin malsawmna dawng zel ding i hi.

2. **A dik leh diklo (Moral/ethics) tena dan kâl a hi:**

Kochuam in Kani lei bawl a khapna/dona ziak pipen khat chu mihing sia leh pha hetna ziak a hi pen hi. Sakhua dang dang haw ziltina lai mugil a le phatna hinkhua leh mani leh midangte chung ah a sia bawlllo di ti hi a hi chiat hi. Kani apat pawt opium khamthei hin zawngsakna a tun a, zia chun mimal a susia khawtâng melphatna a susia bawk hi. A dik leh diklo têtang theitu pen Kochuam chun kani leibawl hi pha a sa pua, mihing zaumna leh thianthona hinkhua tawh kikâl in a ngai a, mimal leh mipite suksiatna ding leh thawkna tunsak sang in a dawpkângna ding zawk hi a ngaitua pipen a hi sek hi.

3. Mimal leh Khawtâng a sukkhakdan:

Kani lei bawlna leh khamthei tawh kimatna hin thagum suanate, tualthanate leh bitlonate a tun a, buaina leh nekjuk chakgukna a siam pung a, khat leh khat kâl a kitaksanna leh kitimatna lam a sukha, masawinna leh khatona ding a malaknate a subuai tasek hi. Khawtâng ah dikna tundin leh mitin kicham dial ah khawsa khawm ding i hinata hi kochuam in a dawipen a, zia buaina chuam chuamte hi bawlpha ding leh khawtâng ah detdona leh kituakna a tuntheina ding in ma a la zel ding a hi.

Kani apat pawt a diak a morphine leh heroin kiti hin nasa tak a zawngsak theina a nei ziak leh a bawl/mangtu te chung a hisellona liantak a tun thei hi. Kochuam hin damdawi matsualna ziak a hiselna sukniam ah um chu thawidam ding leh damna bukim tunsak hi a tup zing

10 ding a hi.

4. Mihiamte phatna ding ngaitua (Humanitarian ground):

Kani lei bawl kochuam in a dodalna ziak chu mimal leh khawtâng phatna ding lunggelna ziak a hi. Kani chîнна gamte hi a tângpi in gentheina'n a tuamte, lekha zilna lam leh damtheina kietkawlna tunlona munte, sum leh pai hawlna haksatna thuakte a hi deu ui. Kani chîнна hin mikhut a kingakna a siam a, min a nawp hun leh dawidan ah a suksiat thei zingte a suak ui. A hinkhawsua theina ding lampi leh masawinna det nei theina lampi hawl piak ding in, kochuamte chun mimal leh khawtângte chu khamthei zuak leh siamte kitâнна pat pawtsak dinga suk thahat hi a panlakna ding a pawimaw a hi.

5. Thilsiamte etkawl:

Khristiante chun leilung leh Pathian thisiamte etkawl leh khawtuana hi mihingte mawpuakna liantak ahi

HINNA VÂK

tí'n a ngai hi. Kani chîn leh kani apat kisiam opium leh heroin-te hin damdawi a ki hamat ziak in i kiang kimvel (environment) a sukha nasa ma ma, Gammang sukgeuchauna, boruak/huithianglo leh khaw umdan kitupsaklona a siam ziak in, Kochuamte chun, Thing leh Thai mihing â ding a damtheina pethei thaichin sak zawk hi a thiltup a hi. I Bible (Thilsiam thu 1:26) ah Pathian in mihingte kianga "Thuneina" a piak hi mani utdan dan a thunei khum lam a kaw k pua, Pathian dawidan ah thilsiamte enkawl ding a mawpuakna

lam zawk a hi ti hiat a pawimaw hi.

Thukhakna: Kochuam in kani chin a dodalna ziak hi genkim zolo ding ihu. Bible zilsakna te, sia leh pha hiatnate, dik leh diklo tenadan a te, mihing hiselna a khawikhak dante a pat hin tamlo i genta, Khristante chun mi zosia kizawpmattua i hinau leh khawvel gam zosia pangkhawm ah zia buaina tuakte panpi thei dan dan ah panpi a, sukdamna nasep hi i ngai pawimaw ma ma ding chu a hi. Khamthei kiti hi khawvel pumpi buaina le a hi ziak in pangkhawmlo ah dozaw ziang di chi le a hipuai ti hemil puai tiu.

MIHING CHU

- A lah kingaitawm ma ma kha a hung chapo ziang tai.
- Lungthim pha tak mai kha mi gensiat a hung ching tai.
- Kipezo tak mai kha a hung kithâda tai.
- Pauchap zing sek mi kha a khawvel mi ma ma tai.
- Midangte hepitu khan midangte a thangsia tai.

Jesu Khrista chu zani, tuni leh kumtuang in a ngai ngai zing hi.
(Heb 13:8)

~ Excerpt : Ramthar August 2023 issue

“KHANGLAITE LEH LAPAWL AH NASEPNA”

~ *Revd. Luttinlel
V. Khawnuam*

Thumapui : I gam ua Missionary ten chanchinpha a hun gennau apat in Khristian i hung hui a. Pathian thu i het ban un, Lasak in Pathian i hun chawihawi uh a hi. Bible ei pau ah i nei masang unle Lâ sak in Pathian i pak tau ti a het thei hi. I pu leh pateu khan Lusei pau in Bible a sim ua, Lâ le a sau a hi. Lapawl hi bangtik hun ah hung kiphudawk/siamdawk a h'em ti het ahi pua, maleh ei uh khawhetma, Kum zakhat masang lam a kipan hita di'n ginchak a um a hi. Paukam pani kigenkhawm sek THU LEH LA, BIBLE LEH LABU ti te hi a kizawm leh kikhentheilo khawp ah um a hui. Kum 1981 February 26-28, sunga MCO Khawmpi 29 veina Leikot khua i mat ua khan Pu THUAMLAL (1922-1997) Lengluang Hausapu kha Kochuam Lapawl sakna ah a bass te lak a samkâng a hinung a le a vak pan kha mittha'n a hung kilang hi. Zia umzia chu Khanglai kisimna ahin kum bithiak (kum 40) tiang himaleh Lapawl ahin chu kumtep/bithiak a umlo a hi. Lapawl ahin a thanuam leh a pang peite zosia a huap zia a kilang hi.

**Lapawl tawh kisai ah
pawimaw khenkhat vak
enkhawm hitiu:**

Conductor : Lapawl
siamdawna ding a hin Hotu
kitûp a pawimaw masa a hi.

Memberte enkawl ding ah
titna chuam chuam solfa/
music he mi leh mi dangte
hilsawn thei mi Hotu umna
a chun Lapawl pha a um thei
bep a hi. Lapawl in a mamaw

HINNA VÂK

chu Hotu pha a hi. Pathian leh Kochuam te'n a guatnau pawm ah nasepna ngaikhawk mi a pawimaw hi.

Members :

A pang ding zat bithiak umlo maleh, a part kim ah pangthei ding members a mamaw hi. Lasak lam a lunglut leh kipezo, Hotute thu zui theite leh midangte tawh semkhawm thei mite panna mun pawimaw tak chu a hi. Pathian nasepna ah kipedawk mi ngei te a hi sek ui. Lapawl member fel leh kitup tak têt a hi sek ui.

Lazil hun :

La sak thei chauh hilo a, thiam tak a zil a ngai ziak in, La zilna hin hun tam tak a ngai hi. Sûn hun ah nasemte i hi ziakun, Zân lam hun lemchang, Kikhawplo Zân leh hun lem dang siam thiam a ngai sek hi. Hun piak tam a ngai ziak in, Insung lam ah Inkuanpite tawh kihetthiam leh ki support tua le a ngai hi.

La têt :

Lapawl ah nasepna ahin a hun leh mun, a thu ah zil a Lê sak a hi ziak in, La têt (select) thiam a pawimaw ma ma a hi. A Lê thu, a kaidân leh Lê a pawl ah sak chi têt a ngai sek hi. Tulai ahin La kiphuak thak thak a um ta, i Doctrine tawh a kituak na em? ti le pilvan a ngai ta a hi. La thupi chuam chuam a um a, Eph. 5:19 ah Pakna Late, Pathian Late, Thagau lam Late ti ahia, eima kipiakna dingte, Vangam ngaina Late a um gual in, La têt thiam hi a pawimaw ma ma hi.

Lapawl ah nasepna :

Khanglai tamzaw panna Lapawl ah nasepna ahin Lapawl min chuam chuam a um a, ziate chu vak gen hitiu.

Kochuam Lapawl :

Tualsung Kochuam in Pathian pakna Lasa pawl ding a nei chu Kochuam Lapawl hih a hi. A hun sung ding leh a etkawl na chu Kochuam khut in a um hi. Kochuam Lapawl

hi Tualsung leh Bial bep hilo in a lemchân dân ah zil in, mudang inle na a sêm thei ui. Kochuam â din Thagau lam ah khantona leh sulimtu le a ti thei hi. Siatni, phatni leh kochuam ni pawimaw a te hin Pathian chawihawina'n hun a mangsek uh a hi. Lapawl kipatna chu Kochuam Lapawl hi a ti thei hi.

Bial Lapawl :

Bial sung kochuamte a pat Lapawl member kilakhawm ah siamdaw a hi. Bial leh Presbytery tiang ah hun bik a te chawihawina late sa in nasepna a nei sek uh a hi. Tulai dinmun ahin Bial Lapawl hin pawimawna a nei lian ma ma a hi. Kitûp tak leh fel tak a Bial Lapawl neitheite chu Bial masawn le a tithei hi.

Synod Choir :

Lapawl dangte min hih eima pau ngen ah gen ahiu a, Synod choir hi chu a sappau (English) tawp mai a hi. A nasepna ahin mundang leh gamdang tiang ah le a huap

ziak a diam! khawvel mun chuam chuam inle a nasepna a nei thei ui, eimau Kochuam sung bep hilo in Synod Choir hin na lianzaw leh huaplían zaw in Pathian na a sem ui ti hetthei a hi. A etkawlna a hin le kochuam in nasa tak a buaipi in sum leh pai tam tak sên a hi. Synod choir hin Synod melhoina a tâklang a, Synod himelphatu chu Syond choir hih a hi a ti thei hi.

Thutawpna : Khanglaite leh Lapawl ah nasepna ahin, mun pawimaw tak tak a lua sek a, i kochuam in Lapawl siamdawna ding in Hun leh Sum tamtak sên le khawki salo uh a hi. Tusang ah masawn zaw i chiato uh kinepna tawh panlâk thakna din pawimaw khenkhat leh duthusam tamlo gen hitiu. Lapawl ah nasepna hin Kochuamte Thagau lam ah ei suhal a Vangam ngaina ei pe lian ma ma hi.

Sound track mat hin lapawl a hawisak a, ei sulim in ei suhal ma ma sek hi. Lasak subwaitu ah pansaklo hâm

HINNA VÂK

hithei leh nawp a um hi. Sound track panglo a pâkna Lâ lemthei leuhin ti bang duthusam a hi. Kum masa lam a khan Synod Kikhawmpi thîlletna ziktu khat in, Tukum Synod Kikhawmpi ah Lapawl sate chun “LÂ A SAU” ti in a zik a. Lapawl hi chu a pawl ah sak ding ahidan a genchian hi. Lapawl uniform i neithe i tau a, a kipak um lam a hi. Lapawl uniform a hawi tawh kigual in a satute’n le hinkhua leh nungchang hawina tawh nasepna thei leu hin, Zia nasepna hin ga tamtak hun

suang ngei ina.

I Synod chanpiu Khasi lamte khu ei uh sang ah chanchinpha a la hemasa a hi ziaku le hintin, ettawn tâk ahinau khat chu Lapawl sa ding ah stage chung a zawt phat ualeh a taithaw(run) sekui. Eilamte ihu leh i chia thaw (walk) sek uh a hi. Umchan leh tawidan ah le malam sawn zel ding in Khanglaite leh Lapawl ah nasepna pan lathak ding in Khanglaite Lalpa’n ei panpi taken.

THILPIAK LÛL

Khatvei chu Pathian thugentu (Evangelist) pakhat hi kikhawppel ah numei naupang pakhat hin a lah châng ah, pakcha hawitak tak a lah pia. Zia Evangelist pa chun kipak tak in a la, “Bang ziak ah zia pakcha hawitak takte hi lei piak maw?” ti’n a vak dawng a. Numei naupang chun, “ka hung lungsiat ziak” a tia. Evangelist chun, “a hi leh Lal Jesu hi hepina thilpiak la pia kha em?” ti’n a dawng kit a.

Numei naupang chun nui silsel kawm in, “I, kei hi ama â ding ah ka kipia ei vei,” a ti’i.

~ Excerpt : Ramthar October 2021 issue

“LALPA AH KIPÂK”

(Philippi 4:4)

~ *Upa H. Thanglunlal*
Sumtukphai

Thumapui : ‘Kipâk’ ti thumal hi mawk gen ah nei ziang thei hileh khawvel a hin kipâk ti thumal hi nicheng ah mihing kam ah pawt tam pen ding in gingchat a um hi. Mihingte’n i thil bawlte, i ngaitua leh sukpitin di i guatna ziate hi kipâk di i ut ziak ah i bawl a hi tângpi sek hi. Chun, mi kipâk thei leh theilo kikal hi le a kikâk ma ma a. Mi kipâk theilo kiang ah chun kuama a um pei gingchat a um pua, thil neu cha cha le kipâk thei te hinkhua chu a nuam a, a kîm leh kiang’ua umte â ding a le malzawl na tuntu a hi sek ui. Ziakiakchun, kipâktheina hi a pawimaw ma ma hi.

Zia thupi’n a tuppen chu Pathian ah kipâk a hi. Pathian ah kipâk ti a um leh chu kipâkna hi mun chuam chuam a pat hawl thei a hi tuak hi. Khawvel inle kipâkna ei pe thei a, zu leh sa, khamthei leh khawvel sum leh pai in a lei leh chawk thei te’n le kipâkna chu bang hem tiang ah ei piak thei’u hileh a kilawm hi. I mimal hinkhuau ah i tuak chiat tâk ngeiu gingchat a um

hi. Ahinla, kipâkna bukim leh sawisel theilo kipâkna kim chu Pathian ah kipâk theite kiang bep ah a um ngei gingchat a um hi.

Tuchung i gâl buai ziak in nasa tak in i thuak ua, i Synod le a thuak sat ngei ka gingcha a hi. Lei leh Vân siamtu, bangkim neitu a thisan man tam tak ah a lei Kochuam chun Lalpa dawi gual ngei in a thei kham kham in mâ a la,

HINNA VÂK

lungngai leh beidawng tak ah um Lalpa belamte, Lalpa Kochuamte chu i Synod in kawng chuam chuam in a natnau leh thawknote'u a hung tuam dam a hi, Lalpa lopina chang ta hen. Nasa tak in i nampi leh kochuam in a thuak ah, a khawk ma ma ziang hi. Zia zing lai ah chun, lang khat lam tak in kei'u S. Munnuam Pastor Bial leh a bîk tak mai in kei'u khua Sumtukphai khua chun Pathian leh Synodte jâl zo in, mihing leh In in nasa tak in ka pun khawlawu a hi. A gûk thim tak in ka kipâk ma ma'u a, tuni chan a hin mâ la zing in, Biak-In thak neina ding in pan ka la sau sau nalai'u a hi.

1. Bang ziak ah Lalpa ah kipâk di a hi diam?

Sawlchak Pawl in Phillipi mite kiang ah lekha a la thawt lai a hin a la genkhawm chu, melma lau um tak tak a um ziak in kochuamte â ding ah kiven zing a pawimaw a, chun, pawimaw ma ma ziang chu, Philippi gingtute

lak ah mimal lawkna hawl leh mi kiletsaknate'n kichuamsena a tut thei zia a la hillâwk a hi. Zia haw zosia boruak a um thei ziak chu mi kipâk theilo a tam ziak'u a hi dan a mudaw thei hi.

Lalpa ah kipâkna chun mihing lungthim leh lunggel a pui zang thei a, mimal hinkhua leh insung hinkhua dinmun a siam phat thei dan hi hiat bep in a hi thei pua, a tep ah tep thaw di, a tuak ah hiat thaw dingdan a hi. Lalpa ah kipâkna chun mihing supiting in a siampha thei hi.

Pathian leh Synod hatna zal in Sumtukphai khua'n S. Munnuam Pastor Bial malakna zal in Relief In 100 hial a kisa thei a, lua in le a um ta, huipi'n In sawm lam hial a mutsia, Kochuamte leh khawsung mitawmngaita pan lakna zal in siamphat zaw le a hi kit ta, kipâk a um ma ma hi. Zia gual ma chun Buallian

a hia, khawdang dang a le zia gual vangsiatna hi thil tung a la hia, kochuamte'n ma la sau sau in siamphat kit ngai a hi thu te dawn a hia, lungdam a um takzet hi. Khawitak khua hi ziang lehle, a cheng thakte a hia, a la chengsate hi ziang lehle i Synod leh Kochuam chung bep a hi pua, Pathian ah i kipak'u hi i bat'u a hi. Bat nei na na chu kipak zel, kipak tak ah malak zel i mawpuaknau a hi.

2. Pathian ah kipakna chu mihing a ding ah hatna petu a hi.

Themtu Setan in a huat ma ma khat chu Jesu Khrista ziak ah kipakna i nei sek'u leh i chan sekte'u hi a hi. Jesu Khrista pak ah kipak tak ah i lam dup dup-te'u, La i sak zawi zawi-te'u hi Setan a ding in a thawk hak sek hi, ziaziaichun, i kipaklona ding leh midang tawh kituaklo tak ah i um theina ding in ma a la

zing sek a hi. Pathian ah kipakna nei theitu chun zia Setan gal chu a zo sek ua, thina leh manna-te'n, zu leh sa kinawptelna-te'n, numei-pawsalna kinawptelna-te'n nuam awm tak leh kipak theina um gual tak in ei them sek a, mi tamtak thep puk ah um in, kipak malak sang in, mimal leh insung tamtak a siat khawlaw a hi. A do zotute a ding a chun kipakna bukim a tun zaw, Pathian ah pat hatna a chan khawlaw sek'u a hi.

3. Pathian ah kipak theite chu khawvel thil in le a kipak thei'ui.

Pathian ah kipaktheilote chu bang gual dinmun in um leu le bangma chan a su kipak thei diak puai. Tuchung ah i malaknau ah pat le ka la mu khat chu, Synod in In a thei kham kham ah a sak piak zaw nung inle kipak thei diaklo mi a um tho tho hi. A tam zawte chun, kei

HINNA VÂK

(Synod in Sumtukphai relief In sakna incharge ah ei kawiu a hi) kiang mai a le kipâkthu a hung gen gen ziang'û a hi. Nasa tak leh lunggil tak ah kipâkte ziak a hin malzawlna nasa tak in mimal tak in ka la dawng hi. In leh lo, nei leh lam, gam leh gua tamtak matsua nung a le Pathian ah kipâk theite ka mu hin i Pathian lopina a kimu, i Synod lulna leh phatna, Pathian umpina lopi a kimu chian deu deu hi. Lalpa chu pak in um ta hen. Pathian ah kipâk theite chu zia khawvel haksatna, thina leh manna, buaina leh lungngainate hin a subeidawng ngai pua, a kipâk thei zel'û a hi.

4. Pathian ah kipâkna chun malzawlna a tun sek hi.

Pathian ah kipâkna chu malzawlna a hi zia hi Sawlchak Paul hinkhua hin a kilang chian ma ma hi. Suangkul sung a te, Lawngsia leh huipi a tuak

lai a te, gilkiäl leh anngawl a tuak lai a te, zep leh sukgentheina a tuak lai inle Lalpa ah chun a kipâk zing thei hi! thilmak leh lopi tak mai chu, a kipâkna hin a kîm leh kiang ah umte, a nasep khawmpite a ding in malzawlna a hi sek hi. Pathian ah kipâk thei mi umna mun ah chun Thagau Thiangtho umpina malzawlna khawvel in a piak theilo a um sek hi. Pathian ah kipâk zel i tuppen hi zel thei leh ut a um takzet hi.

Thukhâkna : Pathian ah kipâk zel kochamte, Synod i hi zel nak'û chun Lalpa Jesu'n i kochuam leh Synod in mun lailung chang zing intin, midangte a ding ah malzawlna hi zel thei ding i hiu. I kipâknau chun ga hun sua intin, malzawlna tuntuu hi zel thei ding i hiu. Lalpa'n a lopina a suklatna, Khrista chanchinpha a suklatna matchak dawii um tak hi zel thei ding in i thupi hi ei malzawl piak ta hen. Amen

“BUALLIAN RELIEF HOUSE REPORT”

~ *Upa D. Kappa*
Buallian

Amasa'n Buallian Relief house sakna tawh kisai report pe thei ding ah hun pha leh damna ei petu Pa Pathian chu chawihawi in um hen.

May 3, 2023 apat i gam sung uh buaina'n a chum ah, In leh lo tamtak halsiat in a um a, bel ding neilo in gamnuai ah te leh mun bit zawk na ah te i hinnau humbit na ding in thei pha tawp sua in pan lakthei dan dan in i lau ah, chutia pan i lak zinglai un i Tangphai Synod hotute chun i mi i sa haksa genthei thuakte sawmdawl na ding leh vak bel vak ding ti'n Insak piak ding ti lunggel ah nei in Buallian Hausate tawh kihotua in Hausapu Pu Khamneipau lemsakna in Buallian ah In 100 sak ding ti thupukna a hun neitau ah, zia insakna nasep enkaitu ding in i Tangphai

Synod hotuten mawpuakna ei hun piau ah, Pathian hatna suang in theilo chung chung in kenle zia mawpuakna chu kala semto hi.

Date 18-09-2023 ni'n Rhino a hung kithak tung hi.

Date 19-09-2023 ni'n In thing ding a hung kithak pan ah, maleh gua a zuk zia in a mun thak tung thei ahilo zia in Buallian Community Hall in kawi a hi.

In sak 1st Phase hi October 13, 2023 ni'n sakpat ahin November 2, 2023 in 1st Phase hi sakzaw a hi. November 20, 2023 in 1st Phase te'n chenlutna a

HINNA VÂK

nei ui. Zia hun ahin Mata Pastor Bial te'n lawplutna Buallian Community Hall in a nei un Bial Chairman Upa Vungkhogin in pauchapna a nei piak hi.

2nd Phase hi November 24, 2023 ni'n sakpat ahin, January 11, 2024 ni'n sakzaw ahi. January 20, 2024 ni'n 2nd Phase ten inlua na a nei ui.

Buallian Relief In sa kuante :

1. D. Phailian Pastor Bial
2. Lamka Pastor Bial
3. New Lamka Pastor Bial
4. Mata Pastor Bial
5. Kangvai Pastor Bial

In sak chungchang ahin amasa pen in Buallian KochuaminInkhatStoreRoom ding ei sak piak ui. 1st Phase ah Insate hi i gen tak gual in Van hi a tamzaw Community Hall ah um ahi zia in mani'n mani â ding a kithak mai uh ahia, Refreshment hi henla chiatua lumlet na vanthakna tite hi mani kochuam chiat in a kipuakdaw a hi. Ziagual ahi

zinglai in Insatute'n tawmngai tak in hun satozel in Pathian zal in sakzaw in a hung umthei tai, In 100 kisa lak in In 94 hi lua ahin In 6 hi a luatu lemchang nailo a hi.

Keima mimal tak in Bial min ah Insa hung kuante chung in kipakthu ka gen ut ah, la tawmngainateu, la kithumatnateu, la titaknateu hi hiatmil theilo a hi. Kangvai Bialte vang vang In leh lo kihal, Frontline ah um, zia gual lawm lawm ah la hun ngaikhawk nateu hi hiatmil ni um puan ah.

Bible in "Thilpha hi dinga siam ah um in" a ti gual ah Office-te ahia, Bial te ahia, maban ah le na thupi tak takte sem daw thei ding in leh Liangvai gentheite sawmdawl thei zel ding in Lalpa'n la sep gim nateu a le tamtak in hun malzawl ta hen.

Vangsiat um tak in a chiasa April 13, 2024 zan in hui in Relief In kisa In 8 a susia'n, In 10 lam hi repair thei din a um in malak zing a hi.

“HAKSATNA I TUAK ZINGLAI A LALPA BEL ZING A KÛL LEH PAWIMAW ZIA CHUH!”

~ *Pi Hmari*
Hill-Town

I hotu lam te'n hinna vak ah sua ding thu hun zik in ei tui a, keima lam kaki en a ka kisuang pua, kum 88 mang lai ka hi ta; ka beng a ngawng a, kamit inle khua a muchian thei tapua, ka khut inle a zik pha thei tapuai. Zik lo mai ka gaw ta, himaleh Lalpa Aw hikhaleh ti in ka lung kagel kit ah, tuma a pat ah ka lungthim ah um zing, Naomi te inkuan chanchin hi ka hiatdan leh ka ngaituana ah kilat dan kahun zik ta a hi.

Naomi hi Israel mi Bethlehem ah um a hia, a min umzia chu “*Lim*” tina a hi. A Pawsal chu Elimelek a hi, Cha pani(2) a nei ua Malon leh Kilon a hi. Bethlehem ah a um lai ua hin Bethlehem a hin kial a hung tung ta. Zia kial chu thuak ngapchalo in Elimelek-te sungkuan chu chawmcha um ding in Moab lam in a chia tau hi. Zia tak a chun, A va khawsa tau hi. Hun hung kihei zel a chun Elimelek Naomi pawsal chu a hung thi ta. Naomi chun a

maljin na mun a chun gualpha leh sÛnpitu umlo in a ma ngawn in sun le jan ah kap in henemtu ding le neilo in a kap a kap ta. Himaleh, Moab chu pawtsan nuamlo in a chapa pani (2) te chu tawh a um zing nalai ui. Hun hung kihei jel in a chapa panite chule piting tangval a hung hi tau. Tichun Zi nei a hung nuam tau a hi. Nisin ah kimupi leh kivawppi teu chu tawh kilungsiat na leh kidawichakna hung um in, tichun a paniau a chun Moab mi milim hote chu a kichenpi

HINNA VÂK

gel gel tau hi. Naomi insung a chun gindan kibanglo Pathian hing hote leh Milim hote chu a hung kawsa khawm tau. Hun a hung kihei jel ah, Naomi chapa panite chu cha neilo in a hung thikit gel gel tau ah, Naomi-te sungkuan hi chawmkhat umding ah Moab gam ah hung himaleu kum sawm (10) lam hial Moab a hin a um tau. Naomi chun vangsiat tawpkhawk in a pawsal leh a chate ni chu a hung sùn tai. Alotheilo in milim ho numei pani chu tawh a hung khawsa to tau a hi.

Zia lai a chun Naomi chu nasatak ah lungngai in a hung kingaitua ta. Chutia sun leh zan ah a hung kingaitua phat a chun Bethlehem lam a hung ngai vawng vawng ta, zia hun laitak a chun khawlai mite paukam a hun heta, Bethlehem mite chu Lalpa'n a hun kantha kit hen Barley bu tun laitak a hi a tiu ah, zia phat a chun a mote kiang in, Bethlehem mite Lalpa'n a

kanthakkit dan a gen a, ama le kile kit a nawp dan a gen hi. Zia phat a chun a pathum ua chun Bethlehem lam ah chia ding in Moab a pat a hung pawt tau a, Naomi chun lampi a chia lai ua chun a hi puai ka chanute la paniu in la nu leh pateu Inlam in kile kit tau in a tia. Mithite leh ka chung ah la phatnateu zosia hi Lalpa'n hun dit ta hen a tia. Zia phat a chun a pathum ua kikawi in nasa tak in a kap tau a hi. Ziazaw a chun Naomi chun kile ding in a sawl kit ngen a, tichun Orpa chun a talpi nu chu a chawp ah a mite tawh milim ho ding in a kilekit tai. Zia phat a chun Naomi chun Ruth kiang a chun en tan la mo chanpinu le a kilekit ta saw nangle a nung ah del in kilekit tan tin a sawl tai. Ruth chun, Naomi bân a chun a tu, lungsiat tak in ka nu leh pa kiang ah kilekit ding in ei sawl takin, la chapa Malon kha um nalai leh a ma tawh kitawn ding la hiu ah, ama la a um ta pua, kei hi a thasang ding hilo ka hi em, nang ngawn in chia

lechin lampi tui pal ah gilkiat leh chau ah basam in um ta lechin kua hem a mawpaw ding, keima hi hilo ka hi em, ziaziaichun la chia chia na chia ingka tin la giak giak na ah giak ingka ti'n, la kivui na na ah kivui ding ka hi, La chite chu ka chite hintin, la Pathian chu ka Pathian hi ta'na. Ei teni hi thina lo chun ei khen kihen a hun ti tai. Naomi inle a pui ta, a panu a chun a chia tau a, Bethlehem chu a va tung tau hi.

Bethlehem chu a tun phat ua chun Naomi lawite leh mite chun Naomi a hung kilekit tai a tiu a, a kiang a chun a ma mu ding in a hung sau sau ui. Naomi chun, Naomi ei ti kiu in, buting tak a ka pawt a Pathian in ka chung ah a khut a tha ta, ka pawsal leh ka chapa panite ei lakpiak ah, tuhin kei ngawn in liangvai leh khut ngawn ah hung kilekit ka hi. Zia zia a chun Marah ei ti zaw tau in a tia.

Bethlehem a chun Naomi tawh Ruth chu a khawsa pan

tau ah, Ruth chu a nu kiang a chun keima lo lam a chia ingka tin bulêp hawl ding in leh ei lungsiat thei ding va hawl ingka a tia, a pawt dawktai. Munkhat a chun Bu di ât a va mu ta, a kiang un lungsiat tak in la lo ua bulêp hung hawl ingka aw, bulêp tilo chu buphal chu khawi him him pua'ngka a tia. Lo neipa chun a la phal piak ta, tichun bulêp chu a hawl ta. Nikhat chu Boaz chu Bethlehem apat in a pawt a, lo lam ah kilawfate kiang a tun chun Lalpa'n hun umpi in mal hun zawl hen ti in a gen tai. Tichun ki lawfate hotupa chu a ko a, zia nungak saw khawilam mi a hem tiin a dawng ah, Ama chun Moab mi Moab a pat ah Naomi in a hung pui a hi, La Lo ua hin bulêp ei hawl sak un Buphal chu khawi pua'ngka atia, La at na nung ua lanutsiau bep uchu la'ngka tiin ei dawn ah Nithum lam ahita, Zingkal a pat Nitak lam tiang in gunchu tak in a hawl sek hi tiin a dawnhu ah.

HINNA VÂK

Boaz chun ama nu a ko ah, ama nu chu a hung ah Boaz ang a chun leitual ah bawkkhup in chibai a buk a, Boaz chun khawilam mi lahi em, khawi apat hung lahi em ti in a dawng a, a ma chun la suaknu hi Moab mi ka hia Moab a pat Naomi hung zui ka hi ti in a dawnhu a. Boaz chun ka chanu zia tak tilo lo dang him him in chia kin la, nungakte lak ah um in a nung uh hawitak in en inla a nutsiau bulêp chu la zel in, la dang a châk lehle tangvalte khaisa tui hi hung dawn jel in, chun tangvalte le thu kape tai a tii.

Tichun, Ruth chu a mai ah leitual siden in kei la suaknu gamdang mi milim ho hinalai, bang tidan ah zia bang lawm lawm ah lei lungsia lei dawisak hi a ti ta, ziaphat a chun Boaz chun la pawsal thi nung ah la talpinu chung ah la phatdan leh la nu leh la pa la pianna gam nusia bangtik lai a le la hetkhaklo la mu na gam le hilo la hung tun ziang hi Lalpa chun la phatna zosia hi hun dit kit hen la, Israel-te

Pathian a thanuai la hun bêlpa Pathian chun hun malzawl ta hen a tia.

Boaz chun Tangvalte kiang a chun la buphal lak ua khenkhatte chu juk dawk unla zia chu a lak takleh gai kiu in a tia. Tichun Sun An a nek phat ua chun, Boaz chun Ruth chu a ko a, hung in tui le hung dawn inla vaithum le hung nen a tia, Ruth a kiang ua a chia in a lak ua chun a hung ta, tuithawl ah tui chu a piau ah vaithum le a piau ah tichun tuite chu a dawn in vaithum chule a ne tai. A nekva nung ah vaithum chu a um nalai a, a nek vâl vaithum chu hawitak in a chûn a nitak lam in a bulêp haw chu a khen tha, Barley têna epha khat a ting ah zia chu pua in inlam in a chia tai. In a tun in a nu chun ka chanu tuni hi bang la ti em ti in a dawng ah, Ruth chun In a tun phat in a nu chu a bupuak a etsak a, chun sun in vaithum ei neksak ua kane kava nung inle a um nalai a zia chu nang â ding in ka hun puak piak a hi ti in a nu chu

a pe tai. A nu chun midang in a hun mulona ding un bu at sungsia chu a ma lo in kuan zing tan a tia, tichun barley bu chu a at zo tau a, phual a bu chu a hun vaw tau hi. Naomi chun Ruth kiang in tuni hin kisel thiang inla kichei in kuaman a hun mulona dingun zan in chia inla Boaz chu a bu veng in phual a lum ding a hin a kiang in awl in chia inla, a puan chu hawk inla a kengbul a valum in a tia. Tichun Ruth chun a nu gengual a chun lo lam ah chia in Boaz puansil chu a hawk a, a kengbul in a lum ta, zankhang in Boaz chu a hung khanglo a, Kua a hem ka kengbul a hung lum chu a ti ta, Ruth chun Moab a pat Naomi hung zui chu ka hi a ti tai. Boaz chun Ruth kiang a chun la chung ua thil hifel ding a um a ka hi fel masia chu tikhan a la um zing in a tia, tichun zing phalvak in Boaz chun Ruth chu a puan vai dimset in bu chu a siam in a puak sak in a chiasak tai. Boaz chun kei hi Elimelek phung a mi golua thei chu ka

hi, a hinla kei sang a la kinai zawk pi mi khat a um a, zia thil ngaitua a genkhawm ding a um a, ka hifel masang sia chu hawi taka a la um zing in tiin a gen a.

Tichun Boaz chun khaw upa te zosia chu a ko a, a bepa chule a ko a kawtkhakbul ah a vaihawm sek nau a chun a kichu khawm ua, zia phat a chun Boaz chu a hung ding ah a bepa kiang a chun tuni hin Naomi chun a gam a zuak in nang tawh kei hi Elimelek phung a um chu i hi ta, la tat a hi chun Elimalek phung a manlo na ding in Moab mi chu la kichenpi ah chi la suan piak ngai in ah a ti tai. Zia phatachun a bepa chun chuti a hileh tan thei pua'ngka a ti ta, nang in tan mai in ti in a mau dan gual in a kengtaw chu a sut a upate kiang a chun a kaw tai. Zia phat a chun Boaz chu a hung ding ah Moab mi Ruth chu keiman kichen pi ingka ti ka puang hi a tia, chun tuni zia tak a upate tawh mipi hung khawm

HINNA VÂK

zosia hi ei hetpitu hi ding in ka hun chial la hui ti in a gen tai. Tichun upa te tawh mipi hungkhawmte chun ka hun hetpi ui ti in a dawnhu tau a, ziaphatachun Boaz chun Ruth chu a Zi ding in a In a chun a puilut tai.

Tichun nau a hun hing a Lalpa'n chapa dawi umtak a hung pe ta. Numeite chu a hung khawm ua Naomi kiang a chun tuni ah la phung chanpi chanau nai hun petu Lalpa chu pak in um ta hen. Israel te lak a hin a min hung thang hen la, nangma hun panpitu leh la têklam tiang ah hun vaktu ding hi ta hen a tiu a. Chun numeite chu Naomi â ding in chapa a piang tai ti in a min ding in Obed hitahen atiu a. Naomi chun nau chu a phei chung in a pai ah a dawn tai. Zia tak ah Obed hi Jesu pianna kizik na bul a hi. (Matthai 1:5)

Keima mudan:

1. Naomi te inkuan Khristian hingal ah Pathian a pat gentheinate, chetnate a hung tunhun a thuak ngamlo a kilepsan.
2. Moab ah chawmkhat umding a chia kum sawm lam um hi eima dawitelna um hi taksa leh thagau lam manthaina leh gentheina lungdawnna kana a hi nuam sek hi.
3. Naomi a pat i muthei chu eima dawitelna ah i um lai a vangsiatna tincheng Lalpa'n ei tuak sak sek hi.
4. Moab ah a um lai a, a chung a thil a tun sak te hi mihing lungthim a tha piak a, zia a pat a hin Pathian hing dawidan a hung geldawkkit thei hi.
5. Pathian in Ruth hi Naomi chung ah a thiltup sukpitinna ding ah a guat a hi.

Naomi te sungkuan a pat Pathian in a thil tuaksakte hi tulai ei gingtu tenle haksatna i tuak lai ua hin Lalpa lam ah kilekit hi tiu. Lalpa'n ei malsawm piak ta hen.

“THAGAU THIANGTHO LEH GINGTUTE ”

~ Rev. T. Zuanlal
New Lamka

Thagau Thiangtho hi Pathian ah mihing pathumte lak ah pakhat a hi. Pa Pathian, Chapa Pathian tawh kipumkhat, hina kibang nasep kibanglo a hiu. I Lalpa Jesu vân ah a kalto nung ah Pa ah kipat a hunsawl chu a hi. Ama Lalpa chun Pa kiang ah a dawn a, “*Thamuantu dang*” bangtik lai ah le gingtute kiang ah um zing chu a hi” (Joh. 14:16). Zia tak ah “*Thamuantu dang*” a ti khêl hin, thamuantu masa chu i Lalpa Jesu genna a hia, ‘*a dang*’ a ti hi Thagau Thiangtho chu a hi. Thamuantu ti chu mundang ah chun ‘*genpiaktu*’ ti inle gen a hi. (Joh. 16:7)

Thagau Thiangtho nasep chu ginglotute a soal uh kihatsak in Jesu Hukdampa ah kawkmu in, a pianthak sak a hi (Joh. 3:5 ; 16:8-10). Chuleh pianthak ah chun a cheng ngal a hi (Eph. 1:13 ; 1 Ko. 6:19-20). Pentecost ni Thagau Thiangtho sunthak a hi a khan mi 3000 hial a piangthak a, tulai a le Thagau nasepna zal in mite’n pianthakna a dawng uh a hi.

Thagau Thiangtho chu mihing a hia, suk lungngai thei kipaksak thei a hi. Gingtu hinkhua ah Pathian dawilo gual bawlkhak umte, ngaituana, pau phalote a um phat leh Thagau Thiangtho chu i sulungngai sek uh a hi (Eph. 4:30-32 sim in). Zialo ah chun Thagau nasep i limsaklo a h’em, i lunggil ua Pathian Aw i ngaisaklo a h’em, Pathian thu eimau ah meigual ah kuang i limsaklo chun Thagau

HINNA VÂK

meisel chu i that mit sek uh a hi. (1 Th. 5:17). Zia hi lau um mama a hi : Mi khat thagau la vei ma ma, la pauchap piak ah ama hukdamna chanchinpha la gen pilo chun zia mei chu mit mai ding a hi. Thagau nasep thatmit, Thagau sumit chu a hi.

Chuleh, a dang khat chu Thagau Thiangtho dem sia ah, zia gitlona hi ginglotute bep in a hi thei a hi. A ziak chu Jesu ginglo ahi ziak un, Jesu nasep kha Thithabuak naseppo in a gen uh a hi (Mar. 3:28-30 ; Joh. 3:17-18). Masang ah i gen panite kha gingtuten a hi khak sek gitlona a hi.

Thagau Thiangtho Pathian chun a nasep lul tak mai chu khawvel ah Jesu neilote chu Hukdampa Jesu a muna ding ua puihuai leh kawkmutu a hi.

Gingtute chu i pianthak hun in Pathian Thagau Thiangtho in kumtuang hinna nei in ei la tepte ta, bangma tik ah mang talo ding hinna, Pathian hinna chu i nei tau a hi (cf. 1 Joh.

5:11-13 ; Joh. 3:16)

Gingtute kiang ah Lalpa'n i hinnau bulpi Thagau Thiangtho tawh i kilaichindan (*relationship*) a genna chun “Thagau Thiangtho chu i chung ua a hung tun phat leh thilhitheina nei inlau...” atia (Nas.1:8). Zia gual deu ahin Zekariah 4:6 na le i mu a hi. “Thagum hatna ziak hilo, thil hitheina ziak le hi diaklo in ka thagua ziak bep in a hi” ti'n sepai hawnte Lalpa chun ati'n. Nasepna gasuana ding in Pathian Thagau ziak bep in thilhitheina um ahi ti i muu a hi. Zia Thagau Thiangtho i chung ah um hi Thagau Thiangtho thaunu ti ah gen in a um a hi. Zialo a chun “Thagau Thiangtho dim” ti in gen a hi (Eph. 5:18) Lalpa Jesu le a nasepna zosia ah Thagau Thiangtho in a dim a hi. Gingu hinkhua thagau thaunu panglo in taksa nasepna mai chu a gasua puai. “Thagau thumna tite”, Thagau thaunu tite, mi khenkhat chun Thagau changte a tiu hi. Khenkhat

chun Thagau Baptisma atiu a, Thagau Baptisma ti hi chu Khrista Lalpa leh Hukdampa i pawm hin Khrista ah Baptis i hi tau ah. Eimau kha hitalo ah Khrista eimau ah a hinna ahi ta a hi (Gal. 2:20)

Thagau thumna chang ding in pauchapna nasa tak ah pan a ngai hi. Gingtute Pentecost ni masang a khan mi 120 a pauchapkhawm ua, tichun Thagau Thiangtho semthak in a um hi. Pathian thutiam chu a mawk pawng ngak mai hilo in pauchap pum in a ngak uh a hi (Nas.1:5, 13, 14, 15). I Biakna Late i saknau ahin Thagau Thiangtho kiang ah pauchapna La a tam ten hi. I mi masate hin Thagau Thiangtho hi ala hechian ten uh a hi (*Etsakna KLB 284*)

“Aw Thagau Thiangtho hung inla, Hatlo ei hihal in, Ginna’n ei musak in Lalpa Zia gam nuam vak tak chu”

Pathian mimat Benny Hinn in a genna chun “Thagau Thiangtho hung inla Khawvel

haksatna leh buaina ka hinna thimpi zing hi vâk chansak in, chuleh ka lungthim hawm hi ei hidim inla ka nakhang le Pathian Aw hethei ding in ei hawn piak in” a tia. Thagau thiangtho umpina panglo in Pathian Aw kihetheilo a hi. Biakna Labu ah Vâh huithiang ka ngai ngei aw hung leng in, Ka lungthim ah thimpi zing hi mutthiang in, Thim leh lung ngaina’n kei ei chumvel ah, Ka zawt lai kumtuang pialgal a liai’ (KLB 291) hi tawh a chung ah Pu Benny Hinn pauchapna i muu ah, Pathian milopite hi Pathian Thagau Thiangtho thumna dawn in dakkal tam pi pi a pauchap ua, a nasepnau a chun malzawlna a luang dawk zung zung mai a hi. Nang leh kei inle zia hi i mamaw hilo ahi diam maw?

Thagau Thiangtho ah dimna bep in nasepnau malzawlna um a hi. Chuleh Thagau in ga a sua ah, Thagau thilpiak (*Spiritual gift*) le mitin in hiatchianna a nei uh a hi.

HINNA VÂK

Ziaziakchun Thagau Thiangtho hi a thiangtho ah gingtu buaknate chu mei gual in a kângthiang sek a hi (Nas.2:3-4)

I Lalpa Jesu ngeile Thagau Thiangtho ah vawpsak ah um in, Baptisma a chan a khan Thagau Thiangtho chu vakhu gual in a chung in a chu, tui lak a pat in Thagau Thiangtho in a dim a, gamthip ah thep ah a um a khan le thagau puihuai a hi. Chanchinpha a genpat a khanle Thagau thilhitheina thuam in aum a hi (Luk. 3:21-

22; 4:1, 14 te sim in) I Lalpa Jesu ngeile Thagau in a umpi zingna zâl ah nasem ahia, ei haw gingtute hin banggual bep in Thagau Thiangtho umpina mamaw i hi tam! Eimau ahin cheng maleh ei lua dim a ngai a hi.

Thagau Thiangtho ah lua dim na chang ah i um theina ding un, “Kithawina hing leh Thiangtho leh Pathian pawmtak hi ding in Lalpa kiang in kilân thak hitin, Lalpa’n simtu zosia â ding in malzawl ta hen.

LAWNG CHAWLNA

Tu masang a khan Cornwall (England) tuipi kam vêl ah chun migilo hawnkhat, lawng suam sek hi a um sekua. Tuipi kam mun khenkhat chu suang kâwl lak leh kensia tak tak lak a hi. Zia suammangte chun a sabiltungu lu ah chun khawnval a khitdenua, tuipi kam mun kensia leh suang lak ah chun A chiapi sekua. Lawng tawlte’n zia vâk chu a mu takua leh lawng chawlna mun hi’na ti’n a va zuan sekul. Maleh, a va nai deu deu phatua leh suang lak ah chun a lawngu chu kitatsia’n a tângden sek hi. Zia phat chuleh suammangte chun a thil puaku thil lûl tak tak a lak thei zosiau chu la’n a suam seku a hi.

Tuni tiang in thagau mi hileh kilawm ma ma, mi tamtak siatna lampi ah pui a um hi. Bangti’n lawng chawlna mun chu i hekhen thei ta diam? Kochuam vâk chu zui in; Khrista din, a taksa hi en in chia lehin bit ina.

~ Excerpt : Ramthar May 2023 issue



**“TAKSA LEH THAGAU AH DAMSAWT LA
NUAM EM? Or THI VAK LA NUAM EM?**

Which one – têt in – only one!!”

(Heb. 12:14 ; 1 John 3:3)

*~ Upa Th. Lalkhomang
Hill-Town*

Kumsin in India gam ah dumzial chep leh muam ziak in mi 2,50,000 cancer a vei u’i ti mudaw a hi. Nisin in India gam ah dumzial chep ziak in mi 2,200 in a hinna a chan u’i. Cancer zosia 100 lak ah 40% chep leh muam ziak ah hung piang a hi. Cancer vei tamna pen India gamsung ah Mizoram hi a khatna a hi. Chep leh muam ziak ah thilmak tak mudawte chu:

- 1) Dum chep banggual chi hilele a lau umlo a um puai. Filter menthol pang, foreign siam, nicotine (dum ah gû um) tawm leh le, a phalo suak kei hi.
- 2) Kuva dummuam pang, Gutkha hi in le, Tiranga a hi in le, a muam chi hitaleh le dum kititaphawt chu a lau umlo a um him him puai.
- 3) Tui bûk, vaibel leh a dang dangte hi suachakna di umlo ngen a hi.
- 4) Mizo zial leh biri hi cigarette sang in a lau um dan a nêp diak puai.

Secondhand smoke (a khu a la dîkte):

Dumzial khu hi mun 3 ah khen mun 2 hi a cheptu chuap ah lutlo in boruak ah a leng vel ah. A cheptun a hiplut a khu gual tho in a kiang ah umte a ding in a lau um a hi.

Pawsalte’n nazial a ha chep ziakun a ziteu nazial cheplo, chuap cancer vei a tam khawpmai hi. Ziagual ah midang dumzial khu boruak ah a la hip lut ve tho hi Secondhand smoke ti a hi. Passive smoking le a ti bawk

HINNA VÂK

u'i.

Secondhand smoke a lau um na hi cancer a hung himai hilo in natna dang dang tampi a tunthei bawk hi. Dumkhu chep nu leh pa chu a chate a hisel ngailo deu sek u'i. Kikhu, awmna, bengngawng leh pneumonia a vei nuam deu u'i. Nu nauvawp lai ah chep leh muam a bawl chun a nauvawp â ding ah siatna liantak a tun thei hi.

Secondhand smoke ahin hui phalo (Poisonous gases) tam thim tak a um bawk hi. Hydrogen Cyanide (*Chemical weapon â ding ah mat hisek*) Carbon Monoxide (Motor meikhu pawtsek), Butane (Gas lighter tui tawh kihel sek) Ammonia (Toilet leh bathroom sukthiangna damdawi) leh Toluene (rawngnuna thinner siamna matchak a hi).

Third hand smoke:

Zia hi dum khu apat thil lau um a mudaw thak uh a hi. Secondhand smoke a khu beikei nung inle dum khu apat gû chi chuam chuam ka gen tak teu kha a cheptu sam ah

te, a puanâkte, pindan sung ah parda-te, cushion, carpet, etc. a te a la um nalai sek a. Zia haw hin lam chuamchuam ah i hiselnau a suse thei a hi.

Dum (Tobacco) kiti hin zia a nuai ah cheng hi a cover (a huap) hi : Cigarette, bidi, zarda, khaini, gutkha, talab, paan masala, etc.

- 1) Dum khu chep/muam ziak in kam, gawl, chuap, An pipe, zun bûk, kal, pancrease (an saktuina) chuleh cervix (naubu tawh zun thakna kizawpnate) zosia hi cancer a suak thei vek hi.
- 2) Dumkhu hin awpnatna kumlui, chuap natna ziak ah hat haksa a tun thei bawk hi.
- 3) Dumkhu chep hin heart (lungchang) leh thisan natna a tun thei bawk hi.
- 4) Dumkhu chep hin pawsalte cha leh nau neinalam ah a zawngkhal sak thei hi. Chuleh, numeite le chabei in a chiin sak thei hi.
- 5) Dumzial khu hin i kamte, i samte, i puante a

namsiatsak sek hi. Chuleh i khutte, i mukte, i mit nuaite a vuai net nut thei hi.

- 6) Taksa hatlo/du na le neilo ah chep naupangte â ding in a lau um khawp mai hi. Awpnatna, khawsik leh Asthma, nau nei tamlo ban ah chuap khanna suhatlo ti te a hiu.

La hekha tam:

- 1) Dum chep hin a guk ah mi a that sek hi.
- 2) Kum sin in mi 4 million a that sek hi.
- 3) India ah mi 6,80,000 kumcheng in a that sek hi.
- 4) India ah mi 2,500 nicheng in a that sek hi.
- 5) Dumzial chep 89% hi kum 18 jongsang (addict) ahiu.
- 6) Cigarette tawn khat in mihing hinna minute 14 a chawm sak hi.

Dumzial chep ten (smokers) :

- 1) Chuap cancer vei bai theina chance 20-25 times
- 2) Heart attack nei theina chance 2-3 times

- 3) Sudden death (thakhata) thi theina chance 3 times

- 4) Damlo sung (sick days) 30-60 sang a tam zaw thei.

Dum khu cheplo/muamlo a phatnate:

- 1) Dumkhu, chep leh muam la ngawl dakkal kipat la taksa ah danglamna a hung um thei ngal hi.
- 2) Minute 20 nung ah la BP apangai (Normal) kitpan hi.
- 3) Dakkal 24 nung ah lungphu chawl ah thi phut theina chance a niam sak hi.
- 4) Kalkhat nung a chun thil tuina leh a gim hiatna a pangai hung um kit tana.
- 5) Kal 2 apat tha 3 sung vel hin thisan chia velna a sem pha thei pan ah, la chuap inle a hi di bang tak in hun lua pan tana.
- 6) Kumkhat nung in heart natna la vei theina chance zaa ah sawmnga in a la kianiam tana.
- 7) Kum 5 nung vang leh chu BP stroke ziak ah thina tungthei chu pumpel thei

HINNA VÂK

hial ding la hi.

**Dum khu suak a tâng, panpi
ngai la hem? Midang panpi
ngai la he em?**

**1. Mizoram State Tobacco
Control Society Office**

*M-15, Chaltlang Venglai
Aizawl Mizoram
Telefax (0389) 2306718
PIN 796012*

*Email: smokefreemizoram@
gmail.com*

**2. Tobacco Cessation Clinic
Room No. 509**

*Laboratory Building (Blood
Bank) chung
Civil Hospital Aizawl
Mizoram Ph. 9862889553
PIN 796001*

Email: tccAiaaw@yahoo.com

**3. Tobacco Cessation Clinic
Kulikawn Hospital Aizawl
Mizoram**

*Ph.9612323934,
9612019561, 9612082298
PIN 796001*

*Email: tccaizawlwest@
gmail.com*

**4. Tobacco Cessation Clinic
Room no. 12**

*Civil Hospital
Chanmari Lunglei*

*Ph. 9856468672,
9436370398
PIN 796701
Email: tcclunglei@gmail.
com*

A hun sua sawntu:

Upa Th. Lalkhomang s/o (L)
Khupzahen, Head-Qtrs Veng
I.B Rd. next to Vimala Raina
High School Lamka (Ccpur)

Melma lauum pente lak ah
khat tobacco (dum-chep leh
muam) thu hun pholangte-

- 1) Mizoram State Tobacco
Control Society Office M-15
Chaltlang Venglai Aizawl,
Mizoram
- 2) Tobacco Cessation Clinic,
Civil Hospital
- 3) Tobacco Cessation Clinic,
Kulikawn Hospital
- 4) Tobacco Cessation Clinic,
Civil Hospital, Chanmari
Lunglei, Mizoram.

Ka la sim leh ka lung a khawi
khawp mai a, lauthawng um
ka sa, dipchak um le ka sa
talua, ziak a chun mizosia sim
leh hiat ding in (Mizo pau
helo) te â ding in tinglo sasa'n

ei Vaiphei pau in ka let daw k a hi.

Zia hin keima Testimony chawmcha hun gen leng – ka hung tangval daw lim in ka lawipa a kipat in 1957 vel in ka hung kizil ah, ka lawipan a hileh kum bangzat ahem nung in khawvel ah eila umlo san tai. Keile dum khu chep hi ka hung zawngsak ta, Biri, Cigarette atûk tûk bang chuleh dum muam haingam chepna tiang ka la tung hi. Ahinla, 1961 kum in Tribal Boys Hostel Old Lambulane in Class VIII ka kailai Hostel ah mi 5 a di An huan in ka pang ah zia pet chun taksa damlona chung in Pathian kiang ah taksa damna ban ah ka la chîn dum khu chep haisan ding in Lalpa kiang ah kitiamna nei in ka cheplo pan tai. Ei hepitu Lalpan ei panpi in tuni tiang in thawveng tak in ka la um thei tai. A nam, a khu hi namsia ka sa naidiak puai. A changle ka manglam in ka la chep sek ah, kum tamtak ki thisan ta tî'n ka la da mama sek hi.

Ka hun gennawp ahileh ei hepitu Lal Jesu zal leh dum khu (Tobacco) a kaizatamte – Tuibuk, Khaini, Gutkha, Zarda, Talab, Pan Masala etc. haw zosia ka nutsianate ziak a ka zi, ka chate, ka tute, ka suapite dampi nalai ka hi ti leng genkhial khello ding ka hi. Ka birthday kum 82 tinna 12/06/2024 hi ding a hi. Lalpa'n tuni tiang damna/hinna ei piak hi mak ka sa lo theilo a hi.

A tawpna pen in ka ngaitak ka lawi leh paite, ka Khristian chanpi zosiate haw, zia Tobacco (chep leh muam) suak ah tang tang nalai ding maw! Hun taisan kin un, aman a hun sialpai ma'n, kei a hatlo pen in bawn ka tha chimmit tak nung in nang uh Pathian chate'n a suak leh sal ah a hun kawi kawi mai ding chu ka hun phal mama tapuai.

Kingaitua phau in ti in ka dawisakna thu ka taklang in, ka hun lân hi. Simtu zosia Lalpan malzawl ta hen.

KNP HUANG

BENGALURU KNP

Bengaluru Kochuam Numei Pawl hi June 11, 2023 ni ah ki phu dawk a hi. Committee member mi 11 a hi'n, member 94 a hi. KNP Committee Member zia a nuai ah gual hi a hi:

1. Pi H. Roselyn Vaiphei
Chairman
2. Pi Tingneiniang
Vice-Chairman
3. Pi Siami Chhangte
Secretary
4. Pi Lalremi Vaiphei
Assistant Secretary
5. Pi Mary Suantak
Treasurer
6. Pi Rachel Vaiphei
Finance Secretary
7. Nk. Chong Nair
Anchangham Secetary
8. Pi Mercy Bawihthlung
Committee Member
9. Pi Lidya Damneihat
Committee Member
10. Pi Jenny
Committee Member
11. Pi Jessy Sonari
Committee Member

Ki vai puak dan

Kikhawpna : Numei Kikhawp hi 1st leh 3rd Sunday Pathian

Biakna Kikhawp pel phat leh matsek a hi. Kikhawp na hi Thuzil lakna, thugenna, lasak khawmna a te mat a hi.

KNP meeting : Tha cheng a 1st Tuesday online ah Zoom meeting nei sek a hi.

Sum hawldan :

1. Tha cheng a 2nd Sunday a KNP nasep na khutthiamthil chawi khawm.
2. Tha cheng a talent sukpun.
3. Puan (Khiangkoi, Thansua, Puandum) zawk

Sep leh bawl ah :

1. Damlo hospitalize te ve na
2. Damlo natna gun nei, In ah ki enkawlte ve na
3. Nau neite ve na
4. Kum 70 a pat a chunglamte ve na leh thilpiak piak na
5. Biak-In hawng ah zi leh pawsal neite kipakpina thilpiak piakna a ki nei sek hi.
6. Pastor Quarter ah mamaw thilte/Inchen matchak pawimawte budget siam ah chawk sek a hi.
7. Anchangham kawitam pente 1st – 3rd tiang kipakman piak a hi.

June 2024



KNP Member zosia leh kikhawp masa pen ah Puitute



KKP HUANG

Tangphai Synod Choir (2024-2026)

Tangphai Synod Choir (2024-2026) Orientation Programme chu May 9, 2024 (Ningani) dak 7 khan Rev. Thangkai leh Rev. Lungpau Hall, Synod Office mun in Rev. Lallunglian Vaiphei, *Leader CKKP* puihuaina in hun mat a hi. General Secretary a pat Report leh Introduction um in; Rev. S. Lama Vaiphei, *Executive Secretary* in tilkhona leh pauchappiakna hun a mang hi. Zia hun hin Choir Member insung mite le a hung pang thei u'i.

CHOIR PUITUTE LEH MEMBERTE			
Sl.No.	Min	Bial	Branch
Convenor - Tv. Thangneikhup, <i>CKKP Comt. Member., D. Phailian Pastor Bial</i>			
Conductor - Tv. Sutlianlal, <i>S. Kawtlian Pastor Bial</i>			
1	Pu T. Manga	Kangvai	Torbung
2	Tv. Bellalzem	Kangvai	Kangvai
3	Tv. Lamminsang	Mata	Buallian
4	Tv. Thangrouchung	Mata	Buallian
5	Tv. Tinmuanlian	Mata	Mata Vengthak
6	Tv. Zoramthang	S. Munnuam	Sumtukphai
7	Tv. Khambiaklal	New Lamka	Bethlehem
8	Tv. Paumuanlal	New Lamka	Gangpimual
9	Tv. Alex Khama Duhlian	Lamka	Hill-Town
10	Tv. Lianlalson	Lamka	Hill-Town
11	Tv. Kaiminlian	D. Phailian	Jubilee
12	Tv. Khaithianven	D. Phailian	Bible Hill
13	Nk. Vungkimjo	Kangvai	Kangvai
14	Nk. Niangmawikim	S. Kawtlian	S. Kawtlian
15	Nk. Khawlsanghoi	Mata	Lingsiphai
16	Nk. Chongmary	S. Munnuam	S. Munnuam
17	Nk. Bliss Lalremruot	S. Munnuam	Sumtukphai
18	Nk. Hoineiphal	New Lamka	New Lamka

June 2024

19	Nk. Boicy Kimdeihing	New Lamka	Gangpimual
20	Nk. Lammary	New Lamka	Gangpimual
21	Nk. Betsy Hoineinieng	Lamka	Nazareth Veng
22	Nk. Lamngaifel	D. Phailian	Jubilee
23	Nk. Florence Nemngaihching	D. Phailian	Centenary
24	Nk. Evelyn Tinglalnei	D. Phailian	Bethany

